

**SECONDA SESSIONE URDINARIA DI U 2023**  
**RIUNIONE DI I 30 DI NUVEMBRE E DI**  
**PRIMU DI DICEMBRE DI 2023**

**2EME SESSION ORDINAIRE DE 2023**  
**REUNION DES 30 NOVEMBRE ET PREMIER**  
**DECEMBRE 2023**

2023 / 02/079

**REPONSE DE MONSIEUR ALEX VINCIGUERRA A LA QUESTION DEPOSEE PAR MADAME  
NADINE NIGAGGIONI AU NOM DU GROUPE FA POPULU INSEME**

**Objet :** Installation et maintien des commerces dans les territoires de l'intérieur et de montagne

Madama a Cunsigliera,

Cum'è a sapete, oramai a nostra pulitica di sviluppu economicu hè cunsacrata, in priurità, à u sustegnu à a pruduzione di robba è di servizii. Ma in listessu tempu ùn ci simu micca scurdati di l'attività commerciale aperte à l'annata inde i paesi, cum'è l'avete detta, attività di primura chì rispondenu à un bisognu di prima necessità è di a ghjente, chì rinforza a leia suciale.

Hè cusì chì pè i dece primi mesi di l'annata 2023, avemu aiutatu una quarantina di prugetti, quaranta cummerci chì si trovanu in zona rurale, pè un muntante di suvvenzione di circa 900 000 €. Nantu à sta glubalità, 30 prugetti sò stati finanziati in cumune scantate assai.

E suvvenzione ùn sò micca u solu arnese dispunibile. Spessu, in complementu avemu dinò strumenti finanziari d'imprestitu o di garanzia. Dapoi u principiu di l'annata, avemu accumpagnatu cusì 36 prugetti situati in cumune di menu di 2000 abitanti. Dunque à a fine di st'annata 2023 averemu aiutatu una centinaia di prugetti commerciali in territoriu rurale, sia 12 % di i prugetti accumpagnati da l'ADEC.

Ma mi pare ch'è, di più ch'è u sustegnu finanziariu, hè statu u consighiu datu à i capiprugetti ch'è statu interessante. Ci hè statu, è ne ringraziu tutti i cullaboratori di l'ADEC, una visita sopr'à piazza per ogni prugettu sustinutu.

Parechje riunioni si sò tinute, ancu per risolve i prublemi è cunflitti. Aghju in mente per esempiu u cunflittu trà i cummercianti taravesi è a grande distribuzione. Ci hè statu dinò una decina di riunioni pubbliche organizzate nantu à u terrenu cù i nostri partinari cunsulari.

In più di l'aiuti à l'imprese ci sò dinò l'aiuti à e cumune di menu di 3000 abitanti. Basta ch'è ste cumune avessinu prugetti per creà, mantene o sviluppà cummerci di prussimità. Ste cumune ci anu dumandatu è anu avutu suvvenzione per accumpagnà creazione inde i paesi sia cù a dutazione **quinquennale**, sia per via di u Fondu di solidarietà territoriale. Issu dispositivu pò esse dinò impuntellatu cù un prestitu à tassu 0%. Dapoi 'ssi ultimi cinque anni, avemu sustinutu cusì una trentina di prugetti per più di 2 milioni d'eurò di suvvenzione.

Dunque i dispositivi di sustegnu ci sò. Oghje per via di una grande prussimità cù i capiprugetti, di una cumunicazione sciolta è di un funziunamentu amministrativu simplificatu assai, tutti 'ssi prugetti sò più faciuli à mette in opera.

Hè què ch'ella ùn hà micca capitu a Ministra francese incaricata di e TPE, di u cummerciu è di l'artigianatu.

Luni ch'è vene ci hà da presentà un novu Fondu di sustegnu à u cummerciu rurale. Stu Fondu averà 36 milioni d'eurò pè a Francia sana è per trè anni, sia 12 milioni per annu pè a Francia sana. Ùn bastanu manc' appena ! In quant' à noi, u metudu ùn ci cunvene micca. U nostru messagiu serà di trasferisce à a CdC a parte prevista pè a Corsica.

Infine, per i nostri risultati, ci vularà ad accoppià à 'ssu sustegnu una visione più larga di u sviluppu campagnolu. Accessu à a fibra, ch'è si face, sustegnu à l'agricultura, ch'è si face, turisimu durevule, ch'è si face, pruduzione d'energia verde, ch'è si face, è dinò accessu à l'alloghju, à a salute è à a mubilità.

In u quattru di u nostru prugettu d'autunomia, ci tuccherà à purtà suluzione legislative, fiscale, finanziarie, adatte per pudè mette in ballu tamante sfide.